

## ПОСЛЕДОВАНИЕ ВЕЧЕРНИ В ПОНЕДЕЛЬНИК СВЕТАЯ СЕДМИЦЫ

По 9-м часу во светильничном, облачится настоятель во всю священную одежду. И став пред святою трапезою с кадильницею, знаменует крестовидно, и возглашает глаголя:

Настоятель: **Благословен Бог наш всегда, ныне и присно и во веки веков.**

Лик: **АМИНЬ.**

Настоятель поет тропарь во святом алтаре: **Христос воскрес из мертвых,\*  
смертию смерть поправ,\* и сущим во гробех живот даровав. (Трижды.)**

Лик: **Христос воскрес из мертвых, смертию смерть поправ, и сущим во гробех живот даровав. (Трижды.)**

Таже настоятель глаголет стихи:

Первый стих: **Да воскреснет Бог, и расточатся врази Его, и да бежат от Лица Его ненавидящии Его.**

Лик: **Христос воскрес: единожды.**

Второй стих: **Яко исчезает дым, да исчезнут, яко тает воск от лица огня.**

Лик: **Христос воскрес: единожды.**

Третий стих: **Тако да погибнут грешницы от Лица Божия, а праведницы да возвеселятся.**

Лик: **Христос воскрес: единожды.**

Четвертый стих: **Сей день, егоже сотвори Господь, возрадуемся и возвеселимся вонь.**

Лик: **Христос воскрес: единожды.**

Слава:

Лик: **Христос воскрес: единожды.**

И ныне:

Лик: **Христос воскрес: единожды.**

Таже настоятель поет вышшим гласом: **Христос воскрес из мертвых, смертию смерть поправ. И отверзает врата.**

Лик: **И сущим во гробех живот даровав.**

Таже ектения великая от диакона: **Миром Господу помолимся.**

Возглас: **Яко подобает Тебе всякая слава, честь и поклонение, Отцу и Сыну и Святому Духу, ныне и присно и во веки веков.**

Лик: **АМИНЬ.**

Посем: Господи, воззвах: 6 стихов, и поем стихиры воскресны 3, глас 3-й:

**Стих:** Аще беззакония назриши Господи, Господи, кто постоит? \* яко у Тебе очищение есть.

**Т**воим крестом, Христе Спасе, \* смерти держава разрушися, \* и диаволя прелесть упразднися; \* род же человеческий, верою спасаемый, \* песнь Тебе всегда приносит.

**Стих:** Имене ради Твоего потерпех Тя Господи, потерпе душа моя в слово Твое, \* упова душа моя на Господа.

**П**росветишася всяческая \* воскресением Твоим, Господи, \* и рай паки отверзется, \* вся же тварь восхваляющи Тя, \* песнь Тебе всегда приносит.

**Стих:** От стражи утренния до нощи, от стражи утренния, \* да уповает Израиль на Господа.

**С**лаваю Отца и Сына силу, \* и Духа Святаго пою власть, \* нераздельное, несозданное Божество, \* Троицу Единосущную, \* царствующую во век века.

**И восточны 3, глас 3-й:**

**Стих:** Яко у Господа милость, и многое у Него избавление, \* и Той избавит Израиля от всех беззаконий его.

**К**ресту Твоему честному поклоняемся, Христе, \* и Воскресение Твое поем и славим; \* Раною бо Твоею мы вси исцелехом.

**Стих:** Хвалите Господа вси языцы, \* похвалите Его вси людие.

**П**оем Спаса от Девы воплощагося; \* нас бо ради распятыя и в третий день воскресе \* даруя нам велию милость.

**Стих:** Яко утвердися милость Его на нас, \* и истина Господня пребывает во век.

**С**ущим во аде спед Христос благовести: \* дерзайте, глаголя: ныне победих, \* Аз есмь Воскресение, Аз вы возведу, \* разрушив смертная врата.

**Слава, глас тойже:**

**Н**едостойно стояще в пречистом дому Твоем, \* вечернюю песнь возсылаем, \* из глубины взывающе, Христе Боже; \* просветивый мир тридневным воскресением Твоим, \* изми люди Твоя от руки врагов Твоих, Человеколюбче.

**И ныне, Богородичен глас 3-й:**

**К**ако не дивимся \* Богомужному рождеству Твоему, Пречестная? \* Искушения бо мужскаго не приимиши Всенепорочная, \* родила бо еси без Отца Сына плотию; \* прежде век от Отца рожденнаго без матери, \* никакоже претерпевшаго изменения, \* или смешения, или разделения; \* но обою существу свойство цело сохраняшаго. \* Темже Мати Дево Владычице, \* Того моли спастися душам, \* православно Богородицу исповедающих Тя.

Вход с кадилом. Свете тихий:

Прокимен великий, глас 7-й:

Бог наш на небеси и на земли, \* вся елика восхоте, сотвори.

Стих: Во исходе Израилеве от Египта, дому Иаковля, из людей варвар, бысть Иудеа святыня Его.

Стих: Море виде и побеже, Иордан возвратися вспять.

Стих: Что ти есть море, яко побегло еси? и тебе, Иордане, яко возвратился еси вспять?

И паки: Бог наш на небеси и на земли:

Иерей: Рцем вси: и прочее. Сподоби Господи: таже, Исполним вечернюю:

И по возгласе поем стихиру воскресну. Глас 3-й:

Воскресение Твое, Христе Спасе, \* всю просвети вселенную, \* и призвал еси Твое создание, \* всеильне Господи, слава Тебе.

Стих, глас 5-й: Да воскреснет Бог и расточатся врази Его.

Пасха священная нам днесь показася: \* Пасха нова святая: \* Пасха таинственная: \* Пасха всечестная: \* Пасха Христос Избавитель: \* Пасха непорочная: \* Пасха великая: \* Пасха верных: \* Пасха, двери райския нам отверзающая: \* Пасха, \* всех освящающая верных.

Стих: Яко исчезает дым, да исчезнут.

Приидите от видения, \* жены благовестницы, \* и Сиону рцйте: \* приими от нас радости благовещения \* Воскресения Христова: \* красуйся, ликуй \* и радуйся, Иерусалиме, \* Царя Христа узрев из гроба, \* яко жениха происходяща.

Стих: Тако да погибнут грешницы от Лица Божия, а праведницы да возвеселятся.

Мироносицы жены, \* утру глубоку \* предсташа гробу Живодавца, \* обретоша Ангела \* на камени сидяща, \* и той, провещав им, \* сице глаголаше: \* что ищете Живаго с мертвыми? \* Что плачете Нетленного во тли? \* Шедше, \* проповедите учеником Его.

Стих: Сей день, егоже сотвори Господь, возрадуемся и возвеселимся в онь.

Пасха красная, \* Пасха, Господня Пасха! \* Пасха всечестная нам возсия. \* Пасха! \* Радостию друг друга обьемем. \* О Пасха! \* Избавление скорби, \* ибо из гроба днесь, \* яко от чертога, \* возсияв Христос, \* жены радости исполни, глаголя: \* проповедите апостолом.

Слава, и ныне, глас 5-й:

Воскресения день, \* и просветимся торжеством, \* и друг друга обьемем. \* Рцем: братие, \* и ненавидящим нас \* простим вся Воскресением \* и тако возопиим: \* **Христос воскрес из мертвых, смертию смерть поправ и сущим во гробех живот даровав.**

Таже Христос воскрес: (трижды)

Таже, диакон: Премудрость.

Лик: Благослови.

Настоятель: Сый благословен Христос Бог наш:

Лик: Аминь. Утверди, Боже:

Таже, настоятель, (вместо: Слава Тебе, Христе Боже)

Христос воскрес из мертвых, смертию смерть поправ:

И Лик: И сущим во гробех живот даровав.

И абие глаголет отпуст со крестом: Христос, воскресый из мертвых: и прочее, якоже изъавися в конец утрени.

## Во Вторник Светлая седмица, на утрени.

Иерей полагает поклон настоятелю, и отходит во святой олтарь, и взем кадильницу стоит перед святою трапезою, и кадит крестообразно, глаголя: Слава Святей и Единосущней: **И** начинает тропарь: во святом алтаре: Христос воскрес из мертвых, \* смертию смерть поправ, \* и сущим во гробех живот даровав. (Трижды.)

**Лик:** Христос воскрес из мертвых, смертию смерть поправ, и сущим во гробех живот даровав. (Трижды.)

**Таже настоятель глаголет стихи:**

**Первый стих:** Да воскреснет Бог, и расточатся врази Его, и да бежат от Лица Его ненавидящии Его.

**Лик:** Христос воскрес: единожды.

**Второй стих:** Яко исчезает дым, да исчезнут, яко тает воск от лица огня.

**Лик:** Христос воскрес: единожды.

**Третий стих:** Тако да погибнут грешницы от Лица Божия, а праведницы да возвеселятся.

**Лик:** Христос воскрес: единожды.

**Четвертый стих:** Сей день, егоже сотвори Господь, возрадуемся и возвеселимся вонь.

**Лик:** Христос воскрес: единожды.

**Слава:**

**Лик:** Христос воскрес: единожды.

**И ныне:**

**Лик:** Христос воскрес: единожды.

**Таже настоятель поет вышшим гласом:** Христос воскрес из мертвых, смертию смерть поправ. **И** отверзает врата.

**Лик:** И сущим во гробех живот даровав.

**Таже ектения великая от диакона:** Миром Господу помолимся.

**Канон, глас 1-й:**

### Песнь 1.

**Ирмос:** Воскресения день, \* просветимся, людие: \* Пасха, Господня Пасха! \* От смерти бо к жизни \* и от земли к небеси \* Христос Бог нас преведе, \* победную поющия.

**Припев:** Христос воскрес из мертвых.

**О**чистим чувства \* и узрим непреступным светом Воскресения \* Христа блистающая, \* и радуйтеся рекуща, \* ясно да услышим, \* победную ноюще.

**Н**ебеса убо достойно да веселятся, \* земля же да радуется, \* да празднует же мир, \* видимый же весь и невидимый: \* Христос бо воста, веселие вечное.

**Богородичен:**

Умерщвления предел сломила еси, вечную жизнь рождшая Христа, из гроба возсиявшего днесь, Дево Всенепорочная, и мир просветившаго.

Воскресшаго видевши Сына Твоего и Бога, радуйся со апостолы Богоблагодатная Чистая: и еже радуйся первее, яко всех радости вина, восприяла еси, Богомати Всенепорочная.

**Катавасия:** Воскресения день, \* просветимся, людие: \* Пасха, Господня Пасха! \* От смерти бо к жизни \* и от земли к небеси \* Христос Бог нас преведе, \* победную поющия.

### Песнь 3.

**Ирмос:** Приидите, пиво прием новое, \* не от камене неплодна чудодеемое, \* но нетления источник, \* из гроба одождивша Христа, \* в Немже утверждаемся.

Ныне вся исполнишася света, \* небо же и земля, и преисподняя: \* да празднует убо вся тварь \* востание Христово, \* в немже утверждается.

Вчера спогребохся Тебе, Христе, \* совостаю днесь воскресшу Тебе, \* сраспинахся Тебе вчера. \* Сам мя спрослави, Спасе, \* во Царствии Твоем.

### Богородичен:

На нетленную жизнь прихожду днесь благостию Рождшагося из Тебе Чистая, и всем концем свет облиставшаго.

Бога Егоже родила еси плотию, из мертвых, якоже рече, воставша видевши Чистая, ликуй, и Сего яко Бога Пречистая возвеличай.

**Катавасия:** Приидите, пиво прием новое, \* не от камене неплодна чудодеемое, \* но нетления источник, \* из гроба одождивша Христа, \* в Немже утверждаемся.

### Ипакои, глас 4-й:

Предварившия утро яже о Марии, \* и обретшия камень отвален от гроба, \* слышаху от Ангела: во свете присносущнем Сущаго \* с мертвыми что ищете, яко человека? \* Видите гробныя пелены, \* тецйте и миру проповедите, \* яко воста Господь, умертвивый смерть, \* яко есть Сын Бога, спасающаго род человеческий.

### Песнь 4.

**Ирмос:** На Божественной стражи \* богоглаголивый Аввакум \* да станет с нами и покажет \* светоносна Ангела, \* ясно глаголюща: \* днесь спасение миру, \* яко воскресе Христос, \* яко Всесилен.

Мужеский убо пол, \* яко разверзый девственную утробу, \* явился Христос: \* яко человек же, \* Агнец наречеса: \* непорочен же, \* яко невкусен скверны, \* наша Пасха, \* и яко Бог истинен \* совершен речеса.

Яко единолетний агнец, \* благословенный нам венец Христос, \* волею за всех заклан бысть, \* Пасха чистительная, \* и паки из гроба красное \* правды нам возсия Солнце.

Богоотец убо Давид, \* пред санным ковчегом \* скакаше играя, \* людие же Божии святии, \* образов сбытие зряще, \* веселимся Божественне, \* яко воскресе Христос, \* яко Всесилен.

### Богородичен:

Создавый Адама Твоего праотца Чистая, зиждется от Тебе, и смертное жилище разори Своею смертию днесь, и озари вся Божественными блистаньми Воскресения.

Егоже родила еси Христа, прекрасно из мертвых возсиявша Чистая зрящи, добрая и Непорочная в женах и красная, днесь во спасение всех, со апостолы радующийся Того прославляй.

**Катавасия:** На Божественней стражи \* богоглаголивый Аввакум \* да станет с нами и покажет \* светоносна Ангела, \* ясно глаголюща: \* днесь спасение миру, \* яко воскрес Христос, \* яко Всесилен.

### Песнь 5.

**Ирмос:** Утреннем утреннюю глубоко \* и вместо мира песнь принесем Владыце, \* и Христа узрим правды Солнце, \* всем жизнь возсияюща.

Безмерное Твое благоутробие, \* адовыми узами содержимии зряще, \* к свету идяху, Христе, \* веселыми ногами, \* Пасху хваляще вечную.

Приступим, священоснии, \* исходящу Христу из гроба, яко жениху, \* и спразднуем любопразднственными чинми \* Пасху Божию спасительную.

### Богородичен:

Просвещается Божественными лучами и живоносными Воскресения Сына Твоего, Богомати Пречистая, и радости исполняется благочестивых собрание.

Не разверзл еси врата девства в воплощении, гроба не разрушил еси печатей Царю создания: отонудуже воскресшаго Тя зрящи Мати, радовашеся.

**Катавасия:** Утреннем утреннюю глубоко \* и вместо мира песнь принесем Владыце, \* и Христа узрим правды Солнце, \* всем жизнь возсияюща.

### Песнь 6.

**Ирмос:** Снизшел еси в преисподняя земли \* и сокрушил еси верей вечныя, \* содержащая связанныя, Христе, \* и тридневен, яко от кита Иона, \* воскресл еси от гроба.

Сохранив цела знаменья, Христе, \* воскресл еси от гроба, \* ключи Девы не вредивый в рождестве Твоем, \* и отверзл еси нам райския двери.

Спасе мой, \* живое же и нежертвенное закование, \* яко Бог Сам Себе \* волею привел Отцу, \* совоскресил еси всероднаго Адама, \* воскрес от гроба.

### Богородичен:

Возведеша древле держимое смертию и тлением, воплотившимся от Твоего пречистаго чрева, к нетленней, и присносущней жизни, Богородице Дево.

Сниде в преисподняя земли, в ложесна Твоя Чистая спедый, и вселивыйся и воплотивыйся паче ума, и воздвиже с Собою Адама, воскрес от гроба.

**Катавасия:** Снизшел еси в преисподняя земли \* и сокрушил еси верей вечныя, \* содержащая связанныя, Христе, \* и тридневен, яко от кита Иона, \* воскресл еси от гроба.

Таже кондак, глас 8-й:

**А**ще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруяй, падшим подай воскресение.

**Икос:** Еже прежде солнца Солнце зашедшее иногда во гроб, предвариша ко утру, ищущия яко дне мироносицы девы, и друга ко друзей вопияху: о другини, приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся, якоже волсви, и поклонимся, и принесем мира яко дары, не в пеленах, но в плащанице обвитому, и плачим, и возопиим: о Владыко, востани, падшим подай воскресение.

**Таже глаголем, глас 6-й:**

**В**оскресение Христово видевше, \* поклонимся Святому Господу Иисусу, \* Единому Безгрешному. \* Кресту Твоему покланяемся, Христе, \* и святое Воскресение Твое поем и славим: \* Ты бо еси Бог наш, \* разве Тебе иного не знаем, \* имя Твое именуем. \* Приидите, вси вернии, \* поклонимся святому Христову Воскресению: \* се бо прииде Крестом радость всему миру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши. [Трижды.]

**В**оскрес Иисус от гроба, \* якоже прорече, \* даде нам живот вечный \* и велию милость. [Трижды.]

### **Песнь 7.**

**Ирмос:** Отроки от печи избавивый, \* быв Человек, \* страждет яко смертен, \* и страстию смертное \* в нетления облачит благолепие, \* Един благословен \* отцев Бог и препрославлен.

**Ж**ены с миры богомудрыя \* в след Тебе течаху: \* Егоже, яко мертва, со слезами искаху, \* поклонившася радующияся Живому Богу, \* и Пасху тайную \* Твоим, Христе, \* учеником благовестиша.

**С**мерти празднуем умерщвление, \* адово разрушение, \* иного жития, вечнаго, начало, \* и играюще поем Виновнаго, \* Единого благословеннаго \* отцев Бога \* и препрославленнаго.

**Я**ко воистинну священная \* и всепразднственная сия спасительная ночь, \* и светозарная, \* светоноснаго дне, \* востания сущи провозвестница: \* в нейже безлетный Свет \* из гроба плотски всем возсия.

**Богородичен:**

**У**мертвив Сын Твой смерть, Всенепорочная днесь, всем смертным пребывающий живот во веки веков дарова, един благословенный отцев Бог и препрославленный.

**В**сем царствуй созданием, быв Человек, вселися в Твою Богоблагодатная утробу, и распятие претерпев и смерть, воскресе Боголепно, совозставив нас яко всеилен.

**Катавасия:** Отроки от печи избавивый, \* быв Человек, \* страждет яко смертен, \* и страстию смертное \* в нетления облачит благолепие, \* Един благословен \* отцев Бог и препрославлен.

### **Песнь 8.**

**Ирмос:** Сей нареченный и святыи день, \* Един суббот Царь и Господь, \* праздников праздник \* и торжество есть торжеств: \* вонъже благословим Христа во веки.

Приидите, новаго винограда рождения, \* божественнаго веселия, \* в нарочитом дни Воскресения \* Царствия Христова приобщимся, \* поюще Его \* яко Бога во веки.

Возведи окрест очи твои, Сионе, и виждь: \* се бо приидоша к тебе, \* яко богосветлая светила, \* от запада и севера, и моря, \* и востока чада твоя, \* в тебе благословящия Христа во веки.

**Троицен:** Отче Вседержителю, и Слове, и Душе, \* трети соединяемое во Ипостасех Естество, \* Пресущественне и Пребожественне, \* в Тя крестихомся и Тя благословим во вся веки.

#### Богородичен:

Прииде Тобою в мир Господь Дево Богородице, и чрево адово расторг, смертным нам воскресение дарова: темже благословим Его во веки.

Всю низложив смерти державу Сын Твой Дево, Своим Воскресением, яко Бог крепкий совознесе нас и обожи: темже воспеваем Его во веки.

**Катавасия:** Сей нареченный и святыи день, \* Един суббот Царь и Господь, \* праздников праздник \* и торжество есть торжеств: \* вонъже благословим Христа во веки.

#### Песнь 9.

**Ирмос:** Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

О Божественнаго, о любезнаго, \* о сладчайшаго Твоего гласа! \* С нами бо неложно \* обещался еси быти \* до скончания века, Христе: \* Егоже, вернии, \* утверждение надежды имуще, радуемся.

О Пасха велия и священнейшая, Христе! \* О мудросте и Слове Божий, и сило! \* Подавай нам истее Тебе причащатися \* в невечернем дни Царствия Твоего.

#### Богородичен:

Согласно Дево, Тебе блажим вернии: радуйся двере Господня: радуйся граде одушевленный: радуйся, Еяже ради нам ныне возсия свет, из Тебе Рожденнаго из мертвых Воскресения.

Веселися и радуйся божественная двере Света: зашедь бо Иисус во гроб возсия, просияв солнца светлее, и верныя вся озарив, Богорадованная Владычице.

**Катавасия:** Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

#### Ексапостиларий. Самогласен:

Плотию уснув, \* яко мертв. \* Царю и Господи, \* тридневен воскресл еси, \* Адама воздвиг от гли \* и упразднил смерть: \* Пасха нетления, \* мира спасение.

[Трижды.]

На хвалитех стихиры воскресны, на 4, глас 3-й:

**Стих:** Хвалите Его на силах Его, \* хвалите Его по множеству величества Его.

**Приидите** вси языцы, \* уразумеите страшныя тайны силу; \* Христос бо Спас наш, \* еже в начале слово, \* Распятся нас ради, и волею погребесе, \* и воскресе из мертвых, еже спасти всяческая; \* Тому поклонимся.

**Стих:** Хвалите Его во гласе трубнем, \* хвалите Его во псалтири и гуслех.

**Поведаша** вся чудеса стражие Твои, Господи; \* но собор суеты, исполни мздою десницу их, \* скрыти мняше погребение Твое, \* еже мир славит, помилуй нас.

**Стих:** Хвалите Его в тимпане и лице, \* хвалите Его во струнах и органе.

**Радости** вся исполнишася, \* Воскресения искус приемша; \* Мария бо Магдалина ко гробу прииде, \* обрете ангела на камени сидяща, \* ризами блистающася и глаголюща: \* что ищите Живаго с мертвыми? \* несть зде, но воста, якоже рече, \* предваря вы в Галилеи.

**Стих:** Хвалите Его в кимвалех доброгласных, хвалите Его в кимвалех восклицания. \* Всякое дыхание да хвалит Господа.

**Во** свете Твоем, Владыко, \* узрим свет, Человеколюбче; \* воскресл бо еси из мертвых, \* спасение роду человеческому даруй, \* да Тя вся тварь славословит, единого Безгрешнаго; \* помилуй нас.

**Стих, глас 5-й:** Да воскреснет Бог и расточатся врази Его.

**Пасха** священная нам днесь показася: \* Пасха нова святая: \* Пасха таинственная: \* Пасха всечестная: \* Пасха Христос Избавитель: \* Пасха непорочная: \* Пасха великая: \* Пасха верных: \* Пасха, двери райския нам отверзающая: \* Пасха, \* всех освящающая верных.

**Стих:** Яко исчезает дым, да исчезнут.

**Приидите** от видения, \* жены благовестницы, \* и Сиону рцыте: \* приими от нас радости благовещения \* Воскресения Христова: \* красуйся, ликуй \* и радуйся, Иерусалиме, \* Царя Христа узрев из гроба, \* яко жениха происходяща.

**Стих:** Тако да погибнут грешницы от Лица Божия, а праведницы да возвеселятся.

**Мироносицы** жены, \* утру глубоку \* предсташа гробу Живодавца, \* обретоша Ангела \* на камени сидяща, \* и той, провещав им, \* сице глаголаше: \* что ищите Живаго с мертвыми? \* Что плачете Нетленнаго во тли? \* Шедше, \* проповедите учеником Его.

**Стих:** Сей день, егоже сотвори Господь, возрадуемся и возвеселимся в оны.

**Пасха** красная, \* Пасха, Господня Пасха! \* Пасха всечестная нам возсия. \* Пасха! \* Радостию друг друга обьемем. \* О Пасха! \* Избавление скорби, \* ибо из гроба днесь, \* яко от чертога, \* возсияв Христос, \* жены радости исполни, глаголя: \* проповедите апостолом.

**Слава, и ныне, глас 5-й:**

**Воскресения** день, \* и просветимся торжеством, \* и друг друга обьемем. \* Рцем: братие, \* и ненавидящим нас \* простим вся Воскресением \* и тако возопиим: \* Христос воскресе из мертвых, смертию смерть поправ и сущим во гробех живот даровав.

Ектении, и отпуст.

## ЧАСЫЙ.

Наченшу иерею: **Благословен Бог наш: Лик: Аминь.** Христос воскрес из мертвых, смертию смерть поправ, и сущим во гробех живот даровав. **трижды.**

**Таже глаголем:**

Воскресение Христово видевше, \* поклонимся Святому Господу Иисусу, \* Единому Безгрешному. \* Кресту Твоему покланяемся, Христе, \* и святое Воскресение Твое поем и славим: \* Ты бо еси Бог наш, \* разве Тебе иного не знаем, \* имя Твое именуем. \* Приидите, вси вернии, \* поклонимся святому Христову Воскресению: \* се бо прииде Крестом радость всему миру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши. **[Трижды.]**

**Таже ипакои, глас 4-й: единощи:**

Предварившия утро яже о Марии, \* и обретшия камень отвален от гроба, \* слышаху от Ангела: во свете присносущнем Суцаго \* с мертвыми что ищете, яко человека? \* Видите гробныя пелены, \* тецыте и миру проповедите, \* яко воста Господь, умертвивый смерть, \* яко есть Сын Бога, спасающаго род человеческий.

**Таже кондак, глас 8-й: единощи:**

Аще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруйай, падшим подай воскресение.

**Таже и сей тропарь единощи:**

Во гробе плотски, во аде же с душею яко Бог, \* в раи же с разбойником, и на Престоле был еси Христе, со Отцем и Духом, \* вся исполняяй Неописанный.

**Слава:**

Яко Живоносец, яко рая краснейший, \* воистинну и чертога всякаго царскаго показася светлейший, Христе, гроб Твой, \* источник нашего воскресения.

**И ныне, Богородичен:**

Вышняго освященное Божественное селение, радуйся. Тобою бо дадеса радость, Богородице, зовущим: благословенна Ты в женах еси, Всенепорочная Владычице.

**Таже Господи, помилуй, 40. Слава, и ныне: Честнейшую Херувим: Именем Господним благослови, отче. Иерей: Молитвами святых отец наших: Мы же речем: Аминь. И паки глаголем подобне: Христос воскрес: трижды. Слава, и ныне: Господи, помилуй. Трижды. Благослови. И отпуст первого часа.**

## НА ЛИТУРГИИ

Антифоны Пасхи.

Антифон 1, псалом 65, глас 2-й:

Стих 1: Воскликните Господеву вся земля.

Припев: Молитвами Богородицы, Спасе спаси нас.

И другой лик тойжде стих: Воскликните Господеву вся земля, пойте же имени Его, дадите славу хвале Его.

Молитвами Богородицы, Спасе спаси нас.

Стих 2: Рцыте Богу: коль страшна дела Твоя, во множестве силы Твоя солжут Тебе врази Твои.

Молитвами Богородицы, Спасе спаси нас.

Стих 3: Вся земля да поклонится Тебе, и поет Тебе, да поет же имени Твоему Вышний.

Молитвами Богородицы, Спасе спаси нас.

Слава, и ныне: Купно оба лика вышшим гласом:

Молитвами Богородицы, Спасе спаси нас.

Таже, ектенна малая.

Антифон второй, псалом 66, глас тойже.

Стих 1: Боже ущедри ны и благослови ны.

Припев: Спаси ны Сыне Божий, воскресый из мертвых, поюция Ти: Аллилуиа. единожды.

Другая страна, тойже стих: Боже, ущедри ны, и благослови ны, просвети лице Твое на ны, и помилуй ны.

Спаси ны Сыне Божий:

Стих 2: Да познаем на земли путь Твой, во всех языцех спасение Твое.

Спаси ны Сыне Божий:

Стих 3: Да исповедятся Тебе людие Боже, да исповедятся Тебе людие вси.

Спаси ны Сыне Божий:

Слава, и ныне: вкупе два лика: Единородный Сыне:

Таже, ектенна.

Антифон 3-й, псалом 67, глас 5-й:

Стих 1: Да воскреснет Бог, и расточатся врази Его.

Тропарь: Христос воскрес из мертвых:

Стих: Да воскреснет Бог, и расточатся врази Его, и да бежат от лица Его ненавидящии Его.

Христос воскрес:

Стих 2: Яко исчезает дым, да исчезнут, яко тает воск от лица огня.

Христос воскрес:

**Стих 3:** Тако да погибнут грешницы от лица Божия, а праведницы да возвеселятся, да возрадуются пред Богом.

**Христос воскрес:**

**И бывает вход. И возглашает диакон, аще есть, аще же ни, иерей:**

**Премудрость, прости.**

**Входное:** В церквах благословите Бога, Господа от источник Израилевых.

**Тропарь:** Христос воскрес:

**Слава глас 4-й:**

Предварившия утро яже о Марии, \* и обретшия камень отвален от гроба, \* слышаху от Ангела: во свете присносущнем Суцаго \* с мертвыми что ищете, яко человека? \* Видите гробныя пелены, \* тецыте и миру проповедите, \* яко воста Господь, умертвивый смерть, \* яко есть Сын Бога, спасающаго род человеческий.

**И ныне: кондак глас 8-й:**

Аще и во гроб снизшел еси, Безсмертне, \* но адову разрушил еси силу и воскресл еси, яко победитель, Христе Боже, \* женам мироносицам вещавый: радуйтесь, \* и Твоим апостолом мир даруй, падшим подай воскресение.

**Вместо же Трисвятаго:** Елицы во Христа крестистесь, \* во Христа облекостесь: \* аллилуиа.

**Прокимен, глас 3-й. Песнь Богородицы:** Величит душа Моя Господа, \* и возрадовася дух Мой о Бозе Спасе Моем.

**Стих:** Яко призре на смирение рабы Своея:

**Апостол в деяниях, зачало 4-й:**

(за? д7) **Во** дни оны, став Петр со единонадесятьми, воздвиже глас свой и рече им: мужие Иудейстии и живуции во Иерусалиме вси, сие вам разумно да будет, и внушите глаголы моя, не бо, якоже вы нещуете, сии пияни суть, есть бо час третий дне, но сие есть реченное пророком Иоилем: и будет в последния дни, глаголет Господь, излию от Духа Моего на всяку плоть, и прорекут сынове ваши и дщери ваша, и юноши ваши видения узрят, и старцы ваши сония видят, ибо на рабы Моя и на рабыни Моя во дни оны излию от Духа Моего, и прорекут, и дам чудеса на небеси горе и знамения на земли низу, кровь и огонь и курение дыма. Солнце преложится во тьму, и луна в кровь, прежде даже не приити дню Господню великому и просвещенному. И будет, всяк, иже аще призовет имя Господне, спасется.

**Аллилуия, глас 8-й:** Воскресни, Господи, в покой Твой, Ты и Кивот святыни Твоея.

**Стих:** Клятся Господь Давиду истиною, и не отвержется ея.

**Евангелие от Луки, зачало 113-й:**

(за? рGi) Во время оно, Петр востав тече ко гробу и приник виде ризы едины лежаща, и отыде, в себе дивяся бывшему. И се два от них беста идуща в тойже день в весь отстоящу стадий шестьдесят от Иерусалима, ейже имя Еммаус, и та беседоваста к себе о всех сих приключшихся. И бысть беседующема има и совопрощающемася, и Сам Иисус приближися идяше с нима, очи же ею держастеся, да Его не познаета. Рече же к нима: что суть словеса сия, о нижже стязаетася к себе идуща, и еста дряхла? Отвещав же един, емуже имя Клеопа, рече к Нему: Ты ли един приплец еси во Иерусалим, и не уведe бывших в нем во дни сия? И рече има: киих? Она же реста Ему: яже о Иисусе Назаряине, Иже бысть муж пророк, силен делом и словом пред Богом и всеми людьми, како предаша Его архиереи и князи наши на осуждение смерти и распяша Его. Мы же надеяхомся, яко Сей есть хотя избавити Израиля, но и над всеми сими, третий сей день имать днесь, отнелиже сия быша. Но и жены некия от нас ужасиша ны, бывшыя рано у гроба, и не обретше телесе Его, приидоша, глаголюще, и явление Ангел видевшие, иже глаголют Его жива. И идоша нещии от нас ко гробу и обретоша тако, якоже и жены реша, Самого же не видеша. И Той рече к нима: о несмысленная и косная сердцем, еже веровати о всех, яже глаголаша пророцы. Не сия ли подобаше пострадати Христу и внити в славу Свою? И начен от Моисеа и от всех пророк, сказаще има от всех Писаний яже о Нем. И приближися в весь, в нюже идяста, и Той творяшеся далечайше ити. И нуждаста Его, глаголюще: облязи с нама, яко к вечеру есть, и преклонился есть день. И вниде с нима облещи. И бысть яко возлеже с нима, и прием хлеб благослови, и преломив даяше има. Онема же отверзостеся очи, и познаста Его, и Той невидимь бысть има. И рекоста к себе: не сердце ли наю горя бе в наю, егда глаголаше нама на пути и яко сказоваше нама Писания? И воставша в той час, возвратистася во Иерусалим и обретоста совокуплены одинагонадесяте и иже бяху с ними, глаголющих, яко воистинну воста Господь и явися Симону. И та поведаста, яже быша на пути, и яко познася има в преломлении хлеба.

Вместо же Достойно, поем:

**Ирмос:** Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Тело Христово примите, источника бессмертнаго вкусите, аллилуиа. [трижды]